

# Yr Eglwys yng Nghymru

## Disgwyliadau Ffurfiannol ar gyfer Gweinidogaeth Drwyddedig

### Egwyddorion a Nodweddion

#### A. Hyder, Sicrwydd a Ffydd Aeddfed

Adeg eu trwyddedu neu eu hordeinio, bydd ymgeiswyr yn gallu siarad yn onest am eu perthynas bresennol â Duw, am le gweddi yn eu bywydau, am astudio'r Beibl ac am eu dibyniaeth ar rym yr Ysbryd. Byddant yn gallu myfyrio gyda hyder priodol ynghylch eu perthynas â Christ ac ynghylch yr hyn y gallant ei gyfrannu tuag at gymdeithas a'r Eglwys yn ogystal ag ynghylch eu lle hwy o fewn y ddau gyd-destun. Byddant eisoes wedi amlygu lefel dda o ddeallusrwydd emosiynol drwy gydol eu rhyngweithio wrth hyfforddi. Byddant yn gallu cyfleu'r modd mae'r hyder hwnnw ynghylch eu hunaniaeth yng Nghrist yn eu galluogi i weinidogaethu mewn ffordd greadigol a llawn dychymyg, gan fentro heb ofni methu. Byddant yn gallu cyfleu'r ffordd mae eu ffydd, wedi'i hysbrydoli gan astudio diwinyddiaeth a'r Beibl, ynghyd â gweddi, wedi eu cynnal drwy gyfnodau anodd yn ogystal ag adegau llawen yn eu bywydau.

#### B. Gweithio mewn Tîm

Adeg eu trwyddedu neu eu hordeinio dylai ymgeiswyr amlygu brwdfrydedd dros weithio mewn tîm a gallu iach a gonest i fyfrio ar brofiadau anodd yn ogystal â rhai cadarnhaol o weithio gydag eraill. Byddant yn gwybod yn iawn am y sgiliau a'r galluoedd y gallant eu cynnig i dimau, yn ogystal ag ynghylch eu diffygion a'u gwendidau wrth weithio gydag eraill. Agwedd bwysig ar eu hyfforddiant fu mynd i'r afael â rhai o'r diffygion a'r gwendidau hynny, a byddant yn gallu siarad yn agored ynghylch ble maent ar y daith honno. Byddant wedi dysgu sut i ymdrin yn effeithiol â chydberthynasau anodd a'u datrys. Byddant wedi myfyrio ynghylch eu rhan hwy eu hunain mewn gwrthdaro yn y gorffennol a'r hyn maent wedi'i ddysgu amdanynt eu hunain a'r ffordd y gallent fod wedi ymdrin â sefyllfaoedd anodd yn well. Byddant wedi amlygu ymrwymiad i feithrin perthynas iach ag eraill.

#### C. Bod yn Greadigol, yn Hyblyg ac yn Abl i Ymaddasu

Adeg eu trwyddedu neu eu hordeinio, bydd ymgeiswyr wedi dangos bod ganddynt y sgiliau yn ogystal â'r anian i allu gweinidogaethu mewn cymdeithas sy'n newid yn barhaus, gan fod yn greadigol ac yn hyblyg. Byddant yn bobl sy'n parhau i ddysgu gydol eu hoes a byddant wedi dangos brwdfrydedd dros ddysgu. Byddant wedi amlygu hyder a pharodrwydd i roi cynnig ar bethau newydd. Byddant wedi dangos brwdfrydedd i rannu eu ffydd mewn ffyrdd sy'n pontio â'r rhai sy'n byw yn eu cymunedau. Byddant wedi amlygu gwytnwch ac ysbryd gobeithiol ar daith hyfforddiant a dirnadaeth, drwy eu hymwneud a'u rhyngweithio ag eraill. Byddant wedi dangos y gallu i weithio y tu hwnt i feysydd sy'n gynefin iddynt ac i roi cynnig ar fentrau newydd. I'r rhai sy'n hyfforddi ar gyfer gweinidogaeth arloesi bydd ganddynt brofiad o ddechrau a chynnal mentrau neu brosiectau.

## **CH. Wedi'u gwreiddio mewn Eglwysoleg ac Ysbrydolrwydd Anglicanaidd**

Adeg eu trwyddedu neu eu hordeinio, bydd ymgeiswyr wedi ennill cymhwyster priodol mewn diwinyddiaeth ac yn gallu trafod mewn modd ystyrllon a diddorol y modd y bu i astudio diwinyddiaeth eu cynorthwyo i dyfu yn eu ffydd. Byddant yn gallu siarad yn wybodus am y Beibl ac am yr hanes, yr eglwysoleg a'r traddodiadau sy'n sail i fywyd yr Eglwys yng Nghymru. Byddant yn gallu dangos eu bod yn gallu tynnu o ffynhonnau dwfn gweddi ac ysbrydolrwydd Anglicanaidd i lywio a chynnal eu bywyd fel gweinidogion. Byddant wedi dangos eu bod yn ddisgybledig yn eu gweddio dyddiol, wrth astudio, addoli ac wrth encilio. Byddant yn amlygu dealltwriaeth o draddodiadau gwahanol i'r rhai maent fwyaf cyfforddus â hwy ac yn ymagweddu'n sensitif tuag atynt. Bydd ganddynt agwedd gadarnhaol tuag at y Gymraeg ac, yn achos ymgeiswyr llawn amser, byddant wedi cymryd camau i sicrhau y gallant gynnal gwasanaethau yn rhannol yn y Gymraeg a defnyddio rhywfaint o Gymraeg mewn sefyllfaoedd bugeiliol. Byddant yn hyderus wrth arwain addoliad mewn gwahanol ddulliau gwahanol ac wrth gyfleu neges y ffydd. Os ydynt yn hyfforddi ar gyfer gweinidogaeth bregethu, byddant wedi datblygu'r gallu i bregethu mewn modd eglur a diddorol.

### **D. Yn Frwd dros Genhadu ac wedi Ymrwymo i Dwf**

Pan fyddant yn barod i'w hordeinio neu eu trwyddedu, bydd ymgeiswyr wedi dangos eu bod yn eangfrydig, yn genhadol eu hysbryd ac yn frwdfrydig dros rannu'r ffydd â'r werin bobl ledled ein gwlad mewn amrywiaeth o ddulliau. Yn eu ffyrdd eu hunain, byddant wedi amlygu ymroddiad ac egni i gofleidio ffydd sy'n fwy â o fudiad na sefydliad. Byddant yn gallu egluro'r ffydd mewn ffordd ddeniadol a bod yn llysgenhadon da i Grist. Byddant wedi amlygu ymrwymiad i weld twf yn yr Eglwys yng Nghymru a byddant yn dod yn gynyddol ymwybodol o'r ffactorau sy'n hybu neu'n llesteirio hynny, yn seiliedig ar eu hastudiaethau a'u profiad personol.

### **DD. Arweinwyr Strategol a Thywyswyr**

Adeg eu trwyddedu neu eu hordeinio dylai ymgeiswyr fod wedi amlygu'r gallu i arwain eraill a'r gallu i ennill ymddiriedaeth a theyrngarwch y rhai y maent yn gweithio yn eu mysg. Er bydd y swyddogaethau arweiniol y byddant yn cael eu galw iddynt yn amrywio o ran cwmpas a maes, bydd angen i bob ymgeisydd am weinidogaeth amlygu dewrder, gwytnwch a'r gallu i ysbrydoli eraill. Byddant eisoes wedi ysbrydoli ac arfogi aelodau cynulleidfaoedd yn eu bywyd fel disgyblion a'u gweinidogaeth eu hunain, ac wedi hybu cydweithio mewn timau iach. Byddant yn deall pwysigrwydd gweithredu o fewn strwythurau goruchwyllo.